

## BERTSO BERRIAK

Miren Amuriza

### Intereconomiari jarriak



#### I

Nork ez darabil sekreturen bat  
kontzientzian sigi-saga?  
Nik behintzat zerbait isildu nahian  
daramat azken bolada,  
baina lehertzeaz nago  
ta ezin dut gehiago!  
Aitortzea libre bada,  
egantxatuta nago zeharo  
*Intereconomiara.*

#### II

*Gato al Agua*, zenbat maitasun  
Euskal Herriaganako!  
“*Bildu* da ETA, dena da ETA”  
hori esan eta planto.  
Zeu ere Patxi Lopez,  
harrotzen jardun ordez,  
laster zara hoientzako  
traidore soil bat, hiru-lau berba  
euskaraz dakizulako.

#### III

Ondoren dator *Punto Pelota*  
gixonkeriaz beterik,  
kirola baino zerbait gehiago  
dela esango nuke nik:  
maite dute fubola,  
gorroto Guardiola,  
zeren hor dabiltzanetik,  
jokoa eraman nahi dute soilik  
eskuineko hegaletik.

#### IV

Aitortu dute homosexualak  
gorrotatzen dituztela,  
eta tratatu behar direla  
gaixo baleude bezela.  
Kondoiak Afrikara  
bidaltzeaz laga,  
ta izorra daitezela...  
Okerrena da dioten baino  
gogorrangoak direla.

#### V

Beren ahotik entzun daiteke  
hitz adina disparate,  
printzipioak gorbatak bezain  
estuan daramatzate.  
Eskuindar, falangista,  
elizkoi ta matxista,  
denek hartzen dute parte.  
Francok burua altxako balu  
harro egongo litzake.

#### VI

Pantaila ertzetik zezen txikiak  
ozen bota du marruma,  
gorbataz janzten diren gizonek  
astakeria bilduma.  
Nahiz eta amorrarazi,  
ta urduritzen hasi,  
izan gogoan laguna,  
zezen guztiei heltzen zaiela  
beren San Fermin eguna.

**DOINUA:** Iparragirre abila dela.



Bidali zure sortak [bertsoak@argia.com](mailto:bertsoak@argia.com) helbidera. Aukeratuak orri honetan argitaratuko ditugu.